

LATGALIŠU GAZETA

Latgalisku pasuokumu maratons

Kū vaira volūdu,
tū lobuok! **LAKUGA.LV**



Desmit diņu laikā sareikuoti desmit latgaliski pasuokumi Reigā, Dagdys nūvodā, Kuorsovā, Viļakys nūvodā i Daugpili. 10. septembrī vīsneicys "Latgola" 10. stuovā nūtyka muzykals pasuokums "Taiseits Latgolā / Made in Latgola" ar latgališu grupu "Dabas Durovys" i "Likteneigais pagrīzīņš iz Vainovu", kai ari Da Gunchi nu grupys "Bez PVN" daleibu. Publikai tyka prezentāti ari diveji jauni videoklipi: "Jej" (Bez PVN) i "Muokslēigī kāmeiši" ("Dabas Durovys") – niu obejus video varit apsavērt ari portalā LaKuGa.LV. Nu ostonu stunžu vokora leidz vālai naktei Daugpiļš augstuokajā punktā vaļdeja latgalisks gors i atmosfera. Paļdis vīsneicai "Latgola" (Rutai Sarkanei personeigi), Arņam Slobožaninam i Latgolys Studentu centram.

Jureits

Piec puora diņu Dagdys nūvoda Šķaunē nūtyka latgališu dzejneicys Marijs Andžānis 100 godu jubilejis atceris breids (vairuok par itū pasuokumu skaitejot laikroksta "Latgals Laiks" 18. septembra numerā).

Nu 13. leidz 18. datumam latgališi uzadorbova pa vaļsts golvys piļsātu, tai svātdiņ, 13. septembrī, Reigā vīs latgališi tyka saukti it iz dīvkolpuojumu Sv. Marijys Magdalenys bazneicā. Ari cytuos svātdiņēs Reigys katuoli teik laipnai aicynuoti iz Sv. Misi latgališu volūdā desmit stundēs nu reita!

14. septembrī Latgolys Studentu centrs jau ūtrū rudini reikuoja vokora stygu – kokursokajā universitatē. Itymā reizē pasuokuma devize beja "Ej šī! Iz munom trepem...!" Par ituo pasuokuma tradiceju klivuse i myusejuo nūvodnika Raiņa piminekļa Reigys Esplanadē isaisiteišona.

15. septembrī nūtyka Dzejis diņu muzykalais pasuokums "Tehnodzeja" Reigys Tehniskajā universitatē. Caturdiņ, 17. septembrī, tymā pat Reigā, kopejnei-

cā "Leningrad" nūtyka džezeigs koncerts grupys "Dabas Durovys" izpiļdejumā, kai ari videoklipa "Muokslēigī kāmeiši" prezentaceja Reigys publikai. Diņu vāluok klubā "Depo" nūtyka kuortejais latgališu muzykys pasuokums ar devizi "Taiseits Latgolā / Made in Latgolā". Pīsadaļeja meitiņu sasksafonistu grupa ar nūsaukumu "Zaļuo Zeme" (nu Skrīveru apļeicinis) – jūs izpiļdejumā izskanēja pādejuo laika popularūs latgališu dzišmu popurejs, kas īsiļdeja publiku i deve spēku ļustēt leidz vālai naktei. Vēļ pasuokumā pīsadaļeja gosti nu Jelgovys ar vīnu dzišmi latgaliski, kai ari vairuokys grupys nu pošys Latgolys: "Dabas Durovys", "D-Light", "Out of Horizon", "Restauratori", tok vysa vairuok publiku sakurnova skaļuoki Latgolys muzykanti – "Green Novice".

Ite pat Latgolā 18. i 19. septembrī grupa "Borowa Mc" ceļova koncertturnejā pa Dagdu i Kuorsovū, tok leluokais nedelis pasuokums tyka sareikuots sastdiņ Viļakys nūvoda Upeitē. Jau ostoitū godu piec kuortys nūtyka vacuokais latgališu meilys aiļu i dzišmu festivals "Upites Uo-

beļduorzs", pīsadaļeja literati: Ontons Slišāns, Zinaida Logina, Jureits, Mārite Slišāne, Raibis Suņs, Santa Matisāne, Karonhisake i Ireta Čekse, a pasuokuma golvoni daliniki vysleidz beja muzykanti kuplā skaitā: "Karburotors" (kai ļauds stuosta – vacuokuo latgališu rokgrupa), "Iļža", jaunišu kapella "Biteites", ansamblis "Rekovas Dzintars", Laura, dzizminiks Vinsents Kūkuojs, grupa "Rudiņš Steigys", "Likteneigais pagrīzīņš iz Vainovu", "Bez PVN", "Dabas Durovys", "Medņevas Puikas", "Out of Horizon", Aija Eriņa i "Green Novice". Pauokuma daliniki i aktivuoki gosti sajēme atsturotuojus ar festivala simboliku. Kai "Latgališu Gazetai" pastuosteja pasuokuma organizators Andris Slišāns, jau ir nūlykts datums cyta goda festivalam – jis byus 18. septembrī, varit atzeimēt pi seve kalendarā. A itymā godā ass bejs tik lobs pasuokums kai vēļ nikod – ļauds viereigai klausējēs dzejņikus i muzykantu spieleišona nūtyka breineigi syltā atmosferā. Vēļ tik grybātūs drusku vaira cylvāku. Tū i nūvielēsīm cytugod sasnigt!

Desmit latgaliski pasuokumi tik desmit diņu laikā! Ruodis, ka trokums nazkaids, tok, nu ūtrys pusis, taišni tai pasuokumus i juoreikoj iz prišku – videji pa vīnam latgaliskam kotru diņu!

"Latgališu Gazetu" atbolsta Latgolys regiona atteisteibys agentura i Kulturkapitāla fonds.



NŪTIKŠONU KALENDERS

- 25.09.2009 (Preiļūs), 26.09.2009 (Varakļonūs) grupys "Borowa Mc" koncertturneja

Turpynoļās grupys "Borowa Mc" koncertturneja pa Latgolū. Itymā reizē koncertus "īsiļdeis" jaunuuo grupa "Restauratori" ar Verneru Martinovu prišķgolā.

- 25. – 27.09.2009 Muzykantu Darbneica Rēzeknis nūvoda Bykovā (Gaigalovā)

Rodūša darbneica i vuceibu nūmetne visim, kam interesej tradicionāluo muzyka, kai ari jau asūšajim i jaunajim kapellu vadeituojim, folklorys kūpu muzykantu grupu, tautys muzykys ansambļu vadeituojim, muzykantim i citim interesentim.

- 26.09.2009., deveitajā stundē nu reita Reigā, pi Reigys Vaļsts 1. gimnazejis, pikets, kab dagrīztu ļaudeibys viereibu latgaļu volūdai i latgaļu volūdys situacejai Latvejā i Eiropā

Eiropys Volūdu diņu nūslāguma pasuokumā nūtyks volūdu darbneicys, kuruos popularizēs, ruodeis i vuceis Eiropys volūdys, volūdu daudzveideibu Eiropā i kotrys volūdys sovpatēibu.

Volūdu darbneicuos byus daudzys eiropišu volūdys, ari latvišu i livu, tok, dīvamžāļ, nabyus senejuos latgaļu volūdys, koč Vaļsts volūdys lykuma 3. panta 4. apakšejais punkts soka, ka "Vaļsts nūdrūšnoj latgališu rokstu volūdys kai senejuo latvišu volūdys paveida globuošonu, sorguošonu i tuoļuoku taiseišonu." Izaver, ka volūdys lykums ir formals i vaļstei patiseibā naryup ni latgali, ni jūs volūda!

Eiropys Volūdu diņys opicialai reikoj Latvišu volūdys agentura.

Piketu reikoj M. Gabrišs (tel.: 26553723) i bīdreiba "Latgolys tradicionāluos kultūrys centrs "Latgaļu sāta"". Piketa reikuošoni ir atļuove nu Reigys dūmis.

- 28.09.2009 17:30 Latgališu volūdys kursi pyrmūdiņu vokorūs Reigā, Latvejis Nacionaluos bibliotekys telpuos, iz Elizabetis i Barona iļys styura, 3. stuovā, 312. ustobā

Latvišu literarajā volūdā rokstom saskaņā ar normom, latgaliski – kai kuram itit pruoatā (ci vyspuor narokstom). Niu ir izdeveiba tū isavuiceit! Izkūpsim sovu latgališu rokstu volūdu! Ar steigu it viersā ituo rudiņa svareiguokais izgleituojšais pasuociņš – Latgolys Studentu centra reikuoti Latgališu rokstu volūdys kursi. Nūtyks pyrmūdiņu vokorūs da semestra beigu.